

四庫全書

集部

欽定四庫全書

鄮峯真隱漫錄卷二十二

宋 史浩 撰

青詞

恭為皇帝本命年設醮青詞

丁未

聖主題期一周甲子皇穹儲祉萬紀春秋輒殫祗禱之
衷仰動高明之覽伏念臣生逢幸會仕偶昌時克授舜
以垂衣正而凝命湯至文而橐矢大以樂天茲當耳順

之年宜衍齒齡之祝是用恭宣藥簡虔籲璇霄伏冀上
帝博臨列真扈從深察微誠之愛戴益增睿筭之延洪
乾清坤寧二氣運行而不殆父慈子孝兩宮燕衍以無
疆溥及華夷咸躋仁壽

昌國保留青詞

國饒近寶誠為貨殖之源水潤作鹹必假陽精之助茲
繫天子殆匪人為謹殫祗祓之誠冀動聰明之鑒伏念
臣謬尸百里粗有四封雖號膏腴亦瀕斥鹵旱則便於

煮海而或慮其無年水則利於殖苗而復憂其失墾惟
雨暘之並若庶財賦之兩全多稼如雲今幸有千倉之
望萬亭積雪顧猶愆一簣之功是用敷淨供於琳宮演
靈科於蒞笈式憑世禮用薦民誠仰冀覆燾無私神明
有格俾潮汐晴陰之得序庶牢盆火齊之悉宜永與蒼
生同依妙蔭

代彭文鹽還醮願青詞

安不忘危是為戒慎窮斯反本乃啟籲呼輒殫小已之

私仰冒大儀之鑒伏念臣飄萍投老竊祿為生歲在丙寅時丁維夏之官遠海寄命孤舟對稭子以懷憂指空溟而結願苟風帆浪舶獲及岍以無虞則璇漢珠躔當肆筵而昭報念從初至甫逮終更實通濟於往來復輯寧於啟處用敬清虛之靖館式宣微妙之靈科深竭愚衷仰酬大施伏冀玉清至聖金闕羣真徧乾象之森羅極嶽神之扈從俯歆芳苾益賜帡幪庶幾末路之光榮盡出無私之覆燾

醮宅青詞

大道無私惟矜民欲至誠有感式契神心謹傾齋潔之
誠冀動妙冲之鑒伏念臣少居畎畝長慕衣冠適當佚
老之秋正藉養生之具乃營蝸室如葺燕巢積材累年
鳩工數月迄緊垂祐遂底落成方百堵之皆興實衆夫
之併作深慮方隅之內或逢星殺之臨儻有震驚必懷
呵譴不少伸於悔謝寧獲免於災沴是用載潔塵居肆
嚴法席肅琳宮之羽客延金闕之芝華上薦微芬用祈

景貺伏願璇霄列聖壤地高真憫此歸投特彰符應闔
門上下獲風雨之忻懽奕世子孫有芝蘭之馥郁誓堅
末景仰答洪私

普天醮青詞

託身大造夙蒙覆載之生成委質清朝久冒聖神之眷
寵遭逢極矣報稱茂如輒伸感謝之悰上瀆淵冲之聽
伏念臣處心雖善過行則多昧理而行俯仰寧逃於愧
忤匪躬以進優隆實荷於宸嚴酬厥恩私宜惟功業念

消塵之未立驚歲月之如流今則綿力愈衰欲為不逮
愛君既切請祝是先爰啓籲呼薄陳醺禮伏願翔龍舞
鶴導法駕以博臨灑道清塵集仙靈而扈從俯昭懇惻

必賜矜從天意既回國威斯振兩宮萬壽永綏充舜之
臣民四海一家悉復文武之境土庶因精禱獲效微忠

意云臣遭遇聖朝徊翔要路念功名之未立愧
爵祿之已崇輒伸報答之私用致禱祈之悃

謝恩設醺青詞

癸卯九月

最爾蟻蜂猶識尊君之義冥然豺獺亦知饗帝之時矧

屬為臣敢忘報上輒控危誠之懇惻仰干淵鑑之聰明
伏念臣猥以凡材親逢聖主全家飽暖徒霑骨肉之親
一品崇高曾蔑毫毛之效常懷愧忤有覲面顏乃力請
於掛冠遂亟蒙於出綈起新公爵襲舊齋旒念大德之
難酬若為報答潔私庭而致禱少寓精虔爰即良辰肆
陳菲席肅璇霄之飈馭宣藥笈之珍文庶仗鴻因上延
睿筭伏冀高真下耳列聖同心畀壽豈於兩宮享昇平
於億載誓殫忠赤仰答穹蒼

經筵丐歸設醮青詞

知足不辱大聖敷言居寵思危前王所戒儻明是理乃
保其身謹殫祗慄之誠冀動威聰之鑒伏念臣一從竊
第兩獲秉鈞荷天眷之優隆乏纖毫之報效抵今晚歲
猶列通班瞻神武以掛冠未容蕭散即長安而賜宅尚
示眷留尸素既踰二年裨益曾無一得內懷慙懼力
請歸休豈惟未拜於俞音更復叨逢於嘉獎再伸前懇
更禱高靈是用恭肆菲筵上邀雲馭伏望三清六帝列

曜衆星同闡大慈俯從卑願既保微臣進退之節且全
聖主終始之恩嘉與私門齊登壽報誓堅香火仰報堪
輿

醮新第青詞

隨牒宦塗久困生涯之萍梗安巢晚歲仰銜造化之帡
幪輒攄既感之誠用徹妙冲之鑒伏念臣起身寒陋遭
世盛明昔無地以置錐今有貲而問舍懇辭政柄賜居
何啻於百楹求返田廬錫地又加於一曲被寵悉由於

聖眷戴恩實本於天矜今則慶大廈之落成絜全家而
來止仰瞻寥廓有象緯之照臨俯燭幽深有神明之窟
宅方其架鑿曷免震驚荷上聖之降康致百靈之赦罪
迄無災害遂此安寧既懷愧謝之私爰啟醮禳之禮伏
冀龍興鳳蹕竝賜博臨乾象坤儀咸興扈衛享茲菲薄
畀以休祥閎闡光輝延微躬之壽考子孫忠孝益後裔
之繁昌誓竭微生仰酬洪祐

周氏生日設醮青詞 丁未

人當疾痛乃欲天矜身及康彊何知帝力茲幸始生之日輒伸歸德之誠竊諒洪慈必垂妙鑒伏念妾賦姿賤族委質貴家疏恩已拜於官封得子又登於科第筋骸安佚衣祿豐餘顧此么麼常知慚愧茲益高穹之眷祐亦惟衆聖之扶持是用齋心必殫美報伏冀龍輿鳳蹕法駕博臨鶴馭雲程仙靈擁從饗初筵之菲薄錫上熏之鴻龐閭閻光華雲仍綿遠誓堅晚景仰答隆私

代周氏禳災設醮青詞

人有罪愆方當臨禍天行赦宥敢不歸恩輒殫恐懼之
衷上瀆聰明之鑒伏念妾夙質孱瑣久積悔尤既無儆
戒之心不識懺除之理月正元日夜至四更火起爐間
人伏枕上浸淫不已撲滅無由倒屣倉惶翻盆救止冥
迷之際顛仆於傍方其失身生則忘矣若有神物掖而
出之於焦頭爛額之中荷回死救生之賜感銘既極禳
謝為先是用恭即琳宮肅延羽士演藥珠之寶笈羞蘋
藻之菲筵企大駕之博臨報洪私之善貸伏冀寬其誅

責錫以康寧曲突徙薪永銷烟燄保家安國益裕子孫
誓竭微軀仰酬丕蔭


保安聖躬設醮青詞

大道無形惟致誠而降格至恩難報緊請禱以輸忠謹
殫祗禱之私上動聰明之鑒伏念臣稟姿寒遠遭世隆
平繇學館以陞榮荷壽皇之眷顧幸逢真主龍飛之旦
獲脩微臣虎拜之恭寵數屢加感心莫喻茲羞藻供用
叩璇霄冀帝駕之博臨保宸躬之衍裕伏願仁風廣扇

道炁遐敷茂延周王安樂之年永錫箕子康寧之福益

隆萬壽洪覆八荒臣無任

云云



鄧峯真隱漫錄卷二十二

欽定四庫全書

集部

鄧峯真隱漫錄卷二十三

四三

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官中書_臣沈孫璉

謄錄監生_臣徐元象

欽定四庫全書

鄒峯真隱漫錄卷二十三

宋史浩撰

疏文

天申聖節功德疏

月紀正陽協元聖誕彌之慶星流華渚啓皇家長發之
祥凡居覆蓋之間舉有歡欣之意矧膺閭寄舊服宰司
不憑清淨之文曷罄延鴻之祝尊號太上皇帝伏願後

天難老如日方中壽豈萬年永享無疆之樂本支百世
幸觀有道之長

華渚流虹戴臨誕節羣心就日請祝聖人爰繙藻笈之
書式贊蘿圖之慶尊號太上皇帝伏願燕謀增衍鴻算
益隆乾清坤夷並受兩儀之貺堯父舜子永齊二帝之
年

二百載而中天允符興運一千年而誕聖於赫昌辰敢
憑西竺之因用介南山之壽尊號太上皇帝伏願堪輿

並貺箕翼齊休降福穰穰誕保無疆之慶為衆父父永
觀有道之長

電繞樞而虹流渚篤生上聖之期嶽脩貢而川效珍共
獻後天之禱式嚴梵宇伸演貝書傾葵藿之誠心祝岡
陵之睿算尊號太上皇帝伏願神靈擁祐福順駢臻大
安大業度越西方之無量時萬時億等東南極之長生
下及海隅同躋壽域

乾為父而坤稱母篤生上聖之辰嶽脩貢而川效珍預

致後天之祝敢仗龍華之會永延鳳歷之期尊號太上
皇帝恭願富壽康寧神祇安樂億萬年之社稷已高付
托之勲八千歲之春秋永享昇平之養

火德紹堯協乘離之興運日符祚漢當載震之昌辰輒
憑西竺之梵香仰祝南箕之睿算尊號太上皇帝伏願
神祇薦祉社稷儲祥帝與九齡益介降年之永嵩呼萬
歲用彰申命之休普及寰區同躋仁壽

簡上帝心久格明昌之治為天子父式臨誕育之辰慶

洽九重歡均萬類爰闡龍華之會仰祈鳳歷之長尊號
太上皇帝伏願保合太和緝熙純嘏聖子以天下養同
介祉於萬年敵人以侵疆歸永推恩於四海

炎歷紹開聖人特起神明薦祉式符震夙之辰梵唄揚
音用衍升恒之祝尊號太上皇帝伏願與天難老介福
無疆非心萬乘之尊見堯仁之惟大永享九重之養彰
舜孝之彌隆普及邇遐咸躋富壽

馬化為龍已肇中興之運虹流在渚式丁載育之辰敢

憑西竺之浮因用介南山之遐壽尊號太上皇帝伏願
體符乾健道合泰通天子有尊永享萬方之養敵人效
順益推四海之恩覃及華戎並躋仁壽

堯仁舜孝丕昭晏粲之期地久天長率籲龐鴻之祝敢
趨淨宇祇被丹誠尊號太上皇帝恭願社稷儲休神祇
薦祉享一日三朝之大養交四方萬里之歡心祝聖人
壽曰辭雖益光於謙德為天子父乃貴願永御於隆平
流虹繞電式開震夙之祥就日望雲共祝綿延之祉爰

憑梵果益行帝齡尊號太上皇帝伏願萬壽無疆百祿
是荷儲神玩意坐觀寰宇之昇平侍膳問安長享聖君
之尊養

會慶節功德疏

天佑民而作君允屬誕彌之慶臣歸美以報上敢伸善
頌之誠恭叩淨方仰禪睿算皇帝陛下伏願受帝之祉
如日方中八千歲之春秋永錫難老億萬年之基業坐
致中興

彌月載臨式應流虹之瑞溥天同慶咸輸就日之誠輒
憑翻譯之文仰罄延鴻之祝皇帝陛下伏願治隆上古
德服遠夷寶祚無窮歷數過有周之永興圖畫復謳吟
思大漢之歸

有王者興應半千之休運使聖人壽衍億萬之脩齡敢
憑西竺之因用慶南山之祝皇帝陛下恭願道尊古昔
德並堪輿既令窮幽極遠之人永離兵戰將見長生久
視之報併祚皇躬兩宮益享於歡榮四海同躋於晏粲

會兩曜於析木之津誕彌厥月起三呼於嵩山之麓壽
考維祺爰歟名藍肅延梵侶庶因殊利用介多祥皇帝
陛下伏願道格高穹德霑羣品九州四海既躋仁壽之
塗億載萬年永享昇平之福

寶歷延鴻祥開華旦聖君誕育慶溢綿區敢憑覺海之
淨因用表愚衷之虔頌皇帝陛下伏願萬靈效順諸佛
薰慈沙磧迢遙喜牛羊之被野楓宸邃密享玉帛之盈
庭嘉與生靈同躋仁壽

三靈眷命方開出震之祥萬國歡心同起後天之祝仗
鴻因於釋梵祈睿算於岡陵皇帝陛下恭願丕冒華夷
混同文軌符邾邠之定鼎三十六世以彌昌越廣成之
脩身千二百歲而未極

誕彌厥月肇開甲觀之祥於斯萬年敢效華封之祝式
憑妙果仰祐睿齡皇帝陛下恭願如日之升後天不老
五百里藩五百里衛均被仁風八千歲春八千歲秋永
隆親養

十月為陽瑞電占樞星之繞一人有慶歡聲激嵩嶽之
呼爰款精藍特憑淨侶宣琅函之祕語言寶歷之洪休
皇帝陛下恭願如日常明與天齊壽行聞漢都護歸奉
萬年之觴願同唐宰臣恭獻千秋之錄

黃河清而聖人生式契千齡之會南極明而天子壽敢
伸三祝之勤廣袞梵宇之良緣仰贊楓宸之景福皇帝
陛下伏願太元授筴鼎祚延洪問安奉長樂之歡受祉
垂後昆之裕九州圖籍重恢禹迹之山川萬里梯航盡

效漢庭之玉帛

顯仁皇太后生辰功德疏

毓聖人躬為天下母爰紀誕彌之慶普伸祝頌之誠恭
演靈科肆陳淨供皇太后殿下伏願與天無極如日方
升天子必有尊永副九重之養百姓徧為德更均四海
之歡

太上皇后生辰功德疏

涼生桂殿序適屆於清秋慶衍椒房詳誕開於彌月恭

集竺園之妙果仰祈南極之遐齡尊號太上皇后伏願
均享萬年並臻五福配天同久常共樂於昇平受祿無
疆用永膺於尊養

女英殯於虞帝既臻偕老於萬年太妊生此文王更得
歡心於四海慶誕彌於北內祝壽量於西乾尊號太上
皇后伏願配日長明如松並茂雍容膝下享聖子之綵
嬉豈樂壺中見來昆之黃髮

皇后生辰功德疏

景貺維新方衍長秋之慶遐齡申錫式開彌月之祥輒
憑翻譯之文仰祝綿延之祉皇后殿下伏願配天同久
並日齊明婦事兩宮永佐九重之養母儀四海益隆百
世之休

乾象昭回仰四星之炳瑞坤儀震夙罄八表以騰歡敢
憑梵唄之良緣用祝椒塗之遐筭皇后殿下伏願至明
儷日厚德承天祇婦道於兩宮化成海宇貽厥孫謀於
百世慶篤家邦

皇太子生辰功德疏

前星增煥夙鍾儲禁之祥彌月載臨誕啓璿源之慶式
憑善頌仰贊遐齡皇太子殿下伏願輝潤無窮燕貽有
永仰少陽之德見國本之彌崇扶太極之尊與皇圖而
並久

儲宮衍慶喜適屆於誕彌靖館翻經請度伸於頌禱皇
太子殿下伏願三靈錫佑百順駢臻歡侍重闈共介無
疆之壽光臨貳極永符有道之長

昌國保瑠道場疏

嘆其乾矣斯成萬瑠之儲雨以潤之則失一年之計敢
憑佛果上動天慈伏願慧日流空仁風扇海凡有波瀾
之地悉為冰玉之區三日之霖利不遺於農畝六月之
汎課自足於版書惟微不獲之一夫庶顯無邊之大覺
昌國洩潭祈雨疏

民亦勞止莫蘇就稿之苗天必從之願霈為霖之雨恭
投驚嶺祇禱龍淵灑道清塵肅花幔而戴地升雲上氣

溪水澤以盈疇凡我有生敢忘大賜

昌國縣衙祈雨疏

炎曦久亢天外峯攢秋稼垂成田間龜拆傾斯民之渴
望祈我佛之哀憐載涓公宇之塵用啓祇園之會伏願
濃雲靄若甘雨霈然蘇萬隴之焦枯慰終年之勤動普
均生殖仰戴慈仁

福州祈雨設水陸疏

某猥以孱陋之姿被此蕃宣之寄由政刑之失當致水

旱之相乘心實知非咎將誰執況紀綱不振列城有獄
訟之寃而教化不明百姓積貪嗔之過叢茲衆惡悉本
一身和氣為之消亡咎徵自然發現已期年而在鎮無
十日之伸眉今則不雨經時涉春已久農欲興於耒耜
澤不潤於田疇種無入土之期人有望霓之急雖兩宵
震電獲粗及於焦枯然三日為霖猶覬優於霖霖感通
已賴神力障隔實在人心不敢怨天唯當罪己用啓冥
陽之供以昭懺悔之誠謹取淳熙元年二月二十一日

重於福州設廳羞設水陸大齋之會普申供養諸佛菩薩莫不梵唄宣揚花慢散墜既設嘉餚珍果又陳風馬金錢演章句之甚深變馨香之無盡仰惟法馭咸賜光臨驅旱魃以歸空策驕龍而效職使此連畦之白壤化為萬頃之清漪澤澤其耕欣欣有喜荷蓑荷笠歲功實自於權輿曰雨曰暘時節更緊於保護則斯民之一飽皆列聖之洪私某既蒙訖成又當追責誓圖竭力仰報垂慈

福州謝雨祈晴疏

本府伏為亢旱日久發心遠詣支提山迎請千聖天冠
菩薩聖象入府祈求甘雨已蒙慈悲降赴大施潤澤連
日靄靄三農遂獲有秋之望今日法駕還山尚須晴霽
輒輸誠懇再恩神威伏惟哀矜不以為瀆即賜從欲以
全聖力者

七閩五穀一歲兩收畝畝易枯經旬不雨則憂旱暵陂
塘無泄三日之霖又慮浸淫怨咨未免於屢興造化亦

難於為力唯菩薩大悲大願隨衆生曰雨曰暘應如空谷
之聲易若轉圜之勢伏願陰雲稍霽甘雨以時雖人心
無厭有是再三之瀆而聖慈至廣曾何適莫之拘仰冀
哀憐卽彰感應五風十雨普天咸底於順調千倉萬箱
比屋永臻於豐富誓堅初意仰報全功

解任辭諸佛疏

輒傾丹悃仰扣洪慈伏念某朴拙無竒迂疎有素席乾
坤之化育荷君父之寵靈乏文武之全材而身獨兼於

將相無循良之美譽而職屢寄於蕃宣自脫服於鄞川
即擁麾於閩部雨暘之禱草偃風行火盜之虞影滅跡
絕屬邑之間無公誤常賦之外不斂財訟簡刑清靡一
夫之棄市年登俗樂有萬口之歌途此皆諸佛菩薩特
展威神有茲幸會感銘雖切報效無從今則某自分衰
遲力求閒散遵古人知止之戒慕前賢勇退之為將陳
馨苾以告違離伏願大造無私至誠有感不替隆恩於
今日永敷妙蔭於斯民然後祐我歸途無諸障難俾之

奠枕以樂昇平儻遂所祈敢忘歸德

新作茅舍供疏

竹籬茅舍粗成田野之居山茗溪泉首作聖賢之供神
既歆而先享人斯處以長寧伏願境界清夷湖山明秀
園林勝事飽聞鐘鼓之音似續世賢永保箕裘之業普
同寰宇咸獲帡幪

葬五祖衣冠招魂功德疏

輒露危誠仰干慈造伏念某生繫積善長遂成人初無

濟治之材能偶獲致位於將相推原本始悉自宗桃頃荷
國恩許建家廟祀及五世榮冠一時幄次既敷神心咸
喜永惟三代而降皆有吉藏獨於高祖以前不知其墓
每當拜掃彌切哀思是用恭擇名山專營幽域將奉衣
冠而俱窆庶令精魄以歸安得地於陽堂下水之後浮
僦土於淳熙戊申之上巳巖壑秀潤風水清奇嘗走里
間徧詢耆老謂吾先系實起自於寒鄉故其令終適並
從於火葬宜往延慶諸藍之淨沼以招鼻祖兩世之英

寬庶使春秋永寧宅兆謹取四月四日奉迎五人肖像
之靈觀用舉百歲同穴之盛儀然而歷時甚深往轍難
究乃即城中二三大刹廣作脩崇普熏衆生億兆先亡
皆霑利樂然後俾我祖宗來趣松楸伏乞三寶印知衆
靈昭鑒儻於是處曾此畱蹤願脫寒波起乘雲馭甫當
召請即賜降臨庶此佳城不為虛設若或道骨既銷於
黃壤仙遊已在於青霄亦覲光明下昭窟宅潛德九原
而可作遺芳萬祀以長存綿後裔以克昌景前修而勿

替普令法界有生之類咸知慶源衍裕之恩

寂照院開田疏

海山浮翠金刹凌雲天童瑞巖介乎左右道人衲子常
所往來無一鉢羞供之儲有數頃寬閒之地將圖耕墾
尚慙荷鍾之資必藉檀那為啓捐金之助儻從所請不
患無成會看萬隴蒼煙化作一犁春雨清漣出耒晨昏
已辦於薰修白雪翻匙飲啄敢忘於來處儻有不思議
福願歸無住相人

代補陀山化緣起殿榜

淵長老

謹按當山係華嚴經所載善財童子來參觀世音菩薩
問法之地童子始因胝羅菩薩指路次第方到海岸孤
絕處得遇菩薩於當山山有潮音洞綿歷千古瑞相常
現變態不可勝記而寶殿墮損欲議鼎新約費錢三千
餘貫若以有力檀那可以取辦一家住持僧某所以親
出緣化者正欲為四衆道俗同結善緣不拘多寡一丈
以上皆悉具足莊嚴功德又況世人同知頂禮菩薩瑞

像同知稱念菩薩聖號同知勤事菩薩香火至於菩薩顯化之地殊特微妙如此則往往不知是猶終日食稻而不知田之所自出也今來舉此勝事伏望遠近道俗推原本始同發善心庶幾世世生生真游菩薩境界為善財童子所得功德等無有異者

右伏以山湧金鼇可謂寂然不動浪環銀屋何妨到處隨流茲為大士香刹林不離衆生塵劫海語化身則無乎不現究發跡則此乃其源儻令玉鳥雲栖一新輪奐

當使珠纓肉髻再顯光明凡於此地有緣人即是今辰
樂施者願假慈悲之大筏同登方便之普門

請倫講師住月波水陸院疏

風烟佳處鍾梵飽聞下臨萬頃澄波中印一輪明月龍
天呵護兩宮之睿藻交輝星斗昭回儲禁之神毫煥發
來居此地拱俟當仁倫公講師得雋祇園傳芳台嶺口
角妙談三觀胷中絕挂一絲屢主名藍爭馳羣衲宜向
無礙道場滋法乳更於甚深寶洞肆潮音優曇華忽爾

重開果符衆望靈山會儼然未散永祝帝齡

請如大德住無量壽庵疏

東湖萬派琉璃下水千巖翡翠中是曾先之窟宅久煩
神物之護持輒企巾瓶虔修香火如公大德夙馳道譽
綽有慈風雖明淨摩尼已絕纖塵之染汚而清深蘭若
尚祈大手之發揮便好承當不須擬議

請道監院住教忠報國院疏

卓矣生全純孝歸歟天子吉藏眷惟我祖之靈宅是真

仙之窟松楸已拱香火久寒必得其人乃膺此選道公
大德入啓霞室登真隱園瞬目揚眉既聞指訣搬柴運
水莫匪神通佇大闡於慈緣以一新於勝地

請雲講師住上水辯利寺疏

路當雙澗會門有兩山朝文宗之翰墨猶存名族之松
楸已拱常嗟勝地未遇當仁來者紛紛隨分經營於粥
飯去之寂寂何心領略於風煙宜得俊流可畢能事雲
公講主六塵休復三觀淹通昔年馳譽於青蓮今日應

緣於辯利會見殘僧野寺化為古德叢林便請承當毋煩辭避

請瀾大師住上水教忠報國院疏

丹桂叢中聳二親之吉兆白雲深處儼諸佛之道場欲挽巾瓶來修香火瀾公大師鬱為法器綽有化緣奮雙拳創建月波山咄嗟已就渡一水再興安樂剎談笑可成行看一代宏規永作諸方嘉話惟茲快便請勿牢辭請眾首座住上水教忠報國院疏

拱秀發之松楸久為吉地煥光騰之金碧中有梵宮欲
成古大道場必待得真法器采公講師學明止觀法妙
聞思能於在處建立伽藍宜向是間發揮叢席會看棟
宇廠百代之帡幪更俾鍾魚飽十方之雲水以此無邊
佛果用酬罔極親恩便請承當毋煩退避

請孜老住昌國吉祥寺疏

朝宗萬派銀濤俱萃於東溟擢秀九峯金剎忽標於彼
岸向諸方搜求勝士來此地建立法幢孜公禪師苦行

孤高圓機灑落徧叅明眼入居士之不貳門屢主道場
演慈航之末後句願令移錫請即浮杯霽一瓣之濃薰
迅登猊座集萬年之洪筭遙祝龍庭

教忠報國院募觀音殿輓瓦疏

東湖勝地上水精藍聳吉祥安樂之名山儼妙智圓通
之瑞像邃殿昭回於奎畫普門示現於靈蹤雖雕梁玉
帛之僅全而蓋瓦級輒之未備輒憑諦信用助帡幪勿
生有限量身心待私家而成就當起無住相布施隨生

處以莊嚴報應靡差慈悲廣攝一念既萌於自己百祥
豈屬於他人快便真箇難逢當機切忌蹉過

月波山求化疏

鄞有錢湖古稱洞府山列千尋之翡翠波涵萬頃之琉璃
即蘋葉藕花之中立梵刹寶坊之勝神呵鬼護煌煌
帝所之宸奎鳳翥鸞翔奕奕春宮之墨妙天童育王與
之鼎峙道人衲子是以雲趨展鉢之衆加多入廩之儲
未裕雖豐濃香火咸推講懺之至嚴而扣擊鍾魚唯慮

堂厨之弗繼是用謀及龜筮禱爾龍天遠投諦信之家
求衍膏腴之地喜既垂於青眼諾斯重於黃金儻令累
陌連阡稍歸下處會見發祥隤祉俱萃高門共成常住
不拔之基永祝至尊無疆之算

二靈山普光院求化疏

一山孤秀宛在水中四獸爭雄皆為從者乃東湖尊貴
之地有二靈勝絕之名韶國師曾此結茅和庵主繼因
卓錫久成湮沒茲發光明雖勅額新頒龍天歡喜而梵

宮火廢雲水寂寥輒登檀信之門用丐帡幪之賜儻垂
金諾成此寶坊施傾有限之資財報受無窮之福利

請倫老住觀音能仁禪院

浙右四明福地金剛三昧道場前揖平湖樓觀招來於
風月後鄰鬧市雲烟隔斷於塵囂巋然清淨之區妙矣
圓通之像肆求主席允屬名流倫公長老臨濟裔孫常
庵嫡嗣飽叅大匠屢住精藍眷吾華封祝聖之方宜此
祇園得雋之士若向三家村裏火熟蹲鴟爭如十字街

頭手縛猛虎是為機便好即承當庶揚大事因緣用衍
兩宮壽筭

鄭峯真隱漫錄卷二十三

欽定四庫全書

鄭峯真隱漫錄卷二十四

宋 史浩 撰

啓

代彭支鹽賀楊樞密知宣州啓

伏審黼帳大臣燕居仙館綸封新命起鎮澄江一方欣
澤被之為榮四海謂公歸之有日涓辰剛吉篤意承宣
竊深歡慶恭惟某官渭水非熊傳巖霖雨昔居樞筦已

舞干羽於舜階今處藩維將試鹽梅於商鼎暫擁西轡
之重來臨壘嶂之間蔭敷白晝之甘棠仁散清宵之畫
角縉紳增耀誰嗟衛士之北門欬唾所加悉是平津之
東閣伏念某江湖末裔塵土微人州縣之職徒勞人筦
庫之官何足道猶遵士檢期綴家聲然而考殆十書章
纔四上一時洪碩阮眸雖憫於孤寒隻字褒揚襴薦未
逢於特達不有薄雲之高義誰其援已於垂成輒伸燕
雀之微誠併冒甄陶之大造尚念鈞閱之遠深慙賀牘

之遲

賀徐侍郎知明州啓

禁籞真儒西離帝闕奎躔景曜東照鄞州湖海增輝士
民胥慶恭惟某官德符時望論右朝評蚤膺簡注之隆
屢錫光華之任七閩權利巔崖均兩腋之清風二浙平
反蔽芾足萬家之美蔭聲飛衆口眷厚一時遂躋中禁
之華途總相南丘之大祀嘉哉啓沃方親玉座之尊寵
以藩宣遽拜虎符之寄矧四明洞天之仙窟實向章孝

子之故鄉正賴風流式期康濟佇擁芝泥之檢仍歸玉
筍之班某忝受一廛將依大冶望塵而瞻馬首阻詣前
途戢翼以附龍鱗行符素望其為欣幸罔罄敷宣

賀錢寶文除淮南運使啓

伏審宸恩荐至漕節再持肆頒紫檢之明綸盡復青氈
之舊物凡居陶冶莫不歡呼恭惟某官方重秉彛粹和
天道蚤由人望自結主知逢時熙泰之朝平步顯嚴之
地初紆郡紱獎提洛下之書生俄擁星軺備給闕中之

糧道方寢躋於館閣遽靖侍於庭闈蒼生謂何未老東
山之安石天下幸甚果來北闕之枚臯眷淮甸之奧區
實江壖之都會人稀地廣貨溢利遺所以煩使指之臨
可以知朝廷之意佇臻康濟即拜登庸某頃以孤寒猥
叨覆露邀聞成命彌激懦衷悵困處於幽畦阻贊榮於
行旆慶頌之至敷述奚殫

賀秦待制除敷學知宣州啓

伏審牙旌入覲綸詔中頒錫南金璀璨之章增內閣邃

延之職朱轡啓道兼過家上冢之榮畫戟凝香寵宣化
承流之寄涓辰開府載路馳聲竊深慶慰恭惟某官先
生當世真儒斯民先覺以軒冕之貴而幼從韋布以鐘
鼎之族而久厭齏鹽文章實甘泉從官之流器識有元
祐諸公之韻英飛霄壤眷重冕旒輒從啓沃之班屢著
仁賢之譽恩波衮衮聲茗雪以言清德宇隆隆與鄧鄭
而爭聳陞華延閣易鎮名藩錫麟經一字之褒光浮奎
畫賁寶帶兼金之飾色耀身章宛水歌謠昔襦已具燕

山咫尺畫錦何殊行底最聞即膺樞拜某巖崎可笑險
阻備嘗昔曾受地於一廛身滋雨露茲復瞻風於數驛
目睇門牆欣聆視事之初疊擁增榮之喜慶抃交至百
倍常情

賀俞數學知紹興府啓

禁林仙伯西離秦淮太微景星東臨禹穴會兩鎮旌麾
之盛實一時朝野之光拜命啓塗涓辰開府竊深歡慶
恭惟某官德為元老道並真儒爰簡注於帝衷遂登崇

於天府政專愷悌寄重蕃宣畫戟凝香靄姑蘇之和氣
朱轡曜彩揚建業之春風既圖任於老成復周旋於藩
輔蕭何鎮撫昔寬西漢之憂畢公保釐茲起東郊之治
佇飛芝檢即亞槐庭伏念某蓬華寒生箕裘未裔得官
一尉待次五期適逢馬首之來偶幸瓜時之及抗塵走
俗知無補於公家附翼攀鱗信有緣於今日其為欣幸
罔罄敷宣

賀史學諭啓

伏審榮奉府符寵還學職青氈舊物僅如合浦之珠白
雪陽春俄示燕公之筆相期甚厚為善不貲某人宗兄
學足美身文能貫道秋天薦鶚昔聞禹穴之先登春浪
化魚今佇堯階之首唱然猶飭躬抗節刻意甘貧摘葉
記遺囊螢聚照詩書滿腹遂為槐市之宗師菽水盡懽
用竭萱堂之侍養行膺結綬彈冠之貴少答截髮斷機
之恩某巷處瓢懸家居壁立四方餬口莫支數百指之
供須五斗折腰未獲三千鍾之廩餼貧非病也且為君

子之固窮勤而行之庶或上士之聞道豈意飜覆雨雲
之日獲從語默金蘭之游同氣相求既克惇於交態
異姓為後更獲踐於宗盟聞鄉先生之得吾人慶邑大
夫之為是舉其為欣頌罔罄敷宣

賀新餘姚高知縣啓

伏審榮綰銅章南辭謝嶺駿馳寶駟北指舜江百里增
光羣情延頸矧居僚屬尤劇歡悰恭惟某官政實吏師
德惟人傑殖二松於奉水飽詠江山起雙舄於蜃川將

臨民社琴堂虛靜咸溪底生花圃幽深佇來潘令祇恐
鳳飛丹檢促對九重不容鯤在北溟暫居一邑伏念某
螢牕暗質雪案寒蹤壯矣效官為養親而就祿佳哉得
地偶賢尹之登車行遂識韓果符慕蘭非所非而是所
是當佩微言步步亦步而趨亦趨願希高躅其為幸會罔
極敷宣

賀曹徽猷知明州啓

蓬瀛路近仙伯承流牛斗星明海邦奠枕漕輓功名於

兩路蕃宣寵寄於一麾凡處封疆欣逢父母恭惟某官
斯民先覺當世真儒蚤由人望之隆自結主知之厚王
畿千里茲已底於富强侯甸列城咸聳觀其風來陞華
延閣共理名藩句章實孝子之故鄉四明乃洞天之仙
窟蕭何鎮撫昔寬西顧之憂畢公保釐茲佇東郊之治
祇恐旁求於柱石不容久駐於旌麾伏念某五斗折腰
方在雲天之下 一廛受地又欣桑梓之邦進退不失其
依歸夙夜實增於鼓舞行迎馬首期一識於荊州庶附

龍鱗獲屢親於北海其為慶幸罔究敷宣

賀徐侍郎知平江府啓

顯被明綸進移巨屏高牙啓道會兩地之旌麾畫鷁衝
風破一川之烟浪凡出甄陶之下尤深鼓舞之私恭惟
某官道茂佐王業隆濟世文章翰墨傳衣鉢於江西政
術謀猷取驂騑於冀北星軺屢擁荷橐斯持暫辭玉笋
之班來闡朱轡之化甘棠敷蔭已騰鄮嶺之芳畫戟凝
香行報姑蘇之政即登黼帳用亞槐庭某齷齪無堪孤

寒有素爰受識韓之幸果符學孔之心燕頤鳶肩知有
他年之稟賦龍鱗鳳翼實資今日之躋攀側聽芝封倍
增雀躍行展望塵之拜先馳賀厦之緘欣忭之悰敷宣
曷既

賀新餘姚趙知丞啓

伏審拜恩楓陞貳政雷封舜水江山歌滿漁樵之路魯
宮芹藻譽先韋布之流矧在末僚尤深歡意恭惟某官
世推儒雅仕著潔廉襲累世服冕乘軒之貴而自處不

驕起方丈列鼎鳴鐘之族而躬修其儉雖風標之未覲
知臭味之必同茲甫瓜時敢伸燕賀行親承於教約用
先叙於寒暄欣忭之私數宣罔既

賀知平江府徐侍郎到任啓

伏審被旨移旌涓辰開府三吳父老欣逢愷悌之師兩
路搢紳迭受帡幪之賜歡謠載路風采動人恭惟某官
高明粹全惇大宏遠蚤以文章之光焰鬱為朝著之
羽儀闔浙星輶聳一時之耳目明蘇熊軾答兩禁之謀

猷畫角聲清甘棠蔭美公平牒訟散為劍井之波瀾灑
落珠璣改觀松江之烟月佇聞報政即見召環某齷齪
無能棲遲自許奉身蝸舍之下敢意求知託跡龍門之
中遂蒙見賞永言特達之遇固非尋常之恩茲承明詔
之頒宣倍激懦夫之踴躍顧台閤之甚遠知賀牘之獨
遲方轉金風冀調鼎食聽日邊詔之屢至庶門下士之
增先欣頌云深敷宣莫究

賀陳監倉漕試得舉啓

伏審文鋒襲敵漕剡登名貞觀蓬瀛始聞踵後春申賓
客不數備員大慰羣心有光吾道恭惟先輩某官文章
俊邁詩禮雍容濃薰芝玉之香痛洗膏粱之習被一鶚
橫飛之薦當雙親未老之時榮孰有加喜應不寐顧惟
東邑已觀魯國之一人佇到南宮又覩漢廷之三道其
為欣頌曷罄敷宣

賀何將仕漕試得舉啓

伏審詞鋒破敵漕剡登榮凡此傳聞舉同頌歎矧屬葭

等之末尤深薦崔之私恭以先輩某官傳粉風標詠梅
才調自傳鉢於家學常韞匱於席珍蘭玉有薰膏梁不
染被一鶚橫飛之薦當雙親未老之時榮孰有加喜應
不寐驟喧紙價已知賦就於十年既出經帷行見策陳
於三道其為欣愜莫究願言

賀王秘校監試得舉啓

橋門壁水羣天下之英豪筆陣文鋒擅場中之聲價剡
飛一鶚名徹九霄竊惟慶慰恭以某人先輩風流烏巷

之居瀟灑青氈之裔藉孔庭之詩禮甘韓子之齏鹽曾
中武庫之森森舌上懸河之滾滾旁觀血指汗顏之斲
獨揮却日之戈下視槍榆控地之卑忽展垂天之翼雙
親未老一舉成名薦目初傳輿情允屬驟喧紙價已知
賦就於十年既出經惟行見策陳於三道其為欣愜莫
究願言

賀秦樞密加特進進爵羣公啓

伏審顯敬大號進策上公極秘殿之隆名正崇階之一

品宏開藥館增重巖膽凡處鈞陶實懷鼓舞恭惟某官
望隆文苑道亞帝師蚤登一鶚於襍章遂造羣龍於堯
殿經帷闡教芸閣主盟華夷安黼帳之謀宗社席泰山
之鎮九重丹宸植巨棟於一門四海蒼生荷洪鈞於二
老庸彰異寵少答元勲聞禮聞詩茂經綸於大業拜前
拜後被尊寵於同時伏念某資稟單微趣尚迂闊雖坐
窮於泥滓猶抗志於雲霄每思前古之聞人取而矜式
矧遇當今之碩輔寧不歸依既幸識韓益思學孔茲聽

龍墀之拜彌深燕廈之情雖祥鳳九天已有離羣之勢
而還丹一粒尚期換骨之榮欣躍之情敷宣罔既

賀胡通判除廣南提舶啓

伏審顯膺中制榮領外臺百粵嚮風列城增耀諒深歡
慶恭惟某官典刑人望儒雅吏師爰淹兩郡之題輿遂
被九重之賜札登車攬轡已風動於羣僚足國裕民行
泉流於百貨即頒召節歸處禁塗歛茲膚使之光華散
作寰區之德澤某頃常望履驟荷知音初無毫髮之先

容每借齒牙之餘論方欣桑梓獲神明愷悌之依遽報
旌壇拜耳目澄清之寄雖今日無從於賀厦而他年尚
覲於登門欣忭之私數宣罔既

賀趙郎中知泉州啓

伏審被命啓途涓辰開府據七閩之劇郡為百辟之賢
模凡在鈞陶舉深朴舞諒惟驪慶恭惟某官道探至域
學悟圓機得聖人之上乘擅宗英之大雅頃自含香握
蘭之寵出膺登車攬轡之權茲領雄藩益施妙手飛帆

漲海悉霑洋溢之恩波畫角譙門咸樂和諧之美韻佇
聞召節即造從班某頃獲望塵驟蒙傾蓋飲食教誨既
親夫子之指南奮發磨礪有類迷人之見北恨羈微祿
尚望修塗未獲日侍經帷徒爾長搖心旆茲喜藩宣之
寄得逢愷悌之師仰止鳳龍已許攀於鱗翼眷同燕雀
敢伸賀於悒悒欣忭之私敷宣罔既

賀知紹興府俞敷學致仕啓

伏審抗志辭榮陞華得謝雖七州卧轍莫回成命於已

行而四海攀鱗共仰高風之難繼凡處甄陶之下舉深
贊頌之私竊以富貴為故鄉之游昔人慕願明哲得保
身之道大雅揄揚季世以還茲風不振蕙帳曉空者多
矣錦衣夜行者皆然況乎愷悌為一世之師忠厚被九
重之眷乃或急流勇退可謂舉世難能恭惟某官先生
材大不羣德尊無玷香濃紫橐久參禁法之班光動碧
幢屢擁帥藩之寄神明聽訟父母愛民政若見其肺肝
私敢欺於毫髮縱使期頤篤老猶當故實頻諮而乃挂

冠於康健之辰脫屣於功名之念是為全節孰企賢蹤
某晚獲執鞭驟蒙推轂雖冠忭今日難遮逸驥之西馳
而呂望來年將慶非熊之入兆其為欣頌罔既敷陳

賀知紹興府湯龍圖到任啓

伏審易鎮輔藩密依宸極夾道聳觀於殲鉞涓辰始見
於吏民凡處帡幪深懷踴躍竊惟歡慶恭以某官道德
元老文章宗師蚤蜚英傑之聲鬱著忠嘉之效桐川德
澤溢浦恩波爰馳淮右之星軺遂擁毗陵之皂蓋日邊

轉計天府尹京上思愷悌之徧敷公欲撫綏之遠暨風
翔八詠仁洽長沙乃飛細札之十行來總近畿之七郡
郵傳流播民相語以交歡風采激揚吏畏威而喪氣是
真儒者實大丈夫畫戟門開喜春風之乍轉油幢節建
親愛日之輕融佇聞玉檢之絲綸即啓金甌之姓字伏
念其窮姿弱質齷齪微材偶尸下邑之卑官適偶達人
之大觀昔年青史嘗思欣慕以執鞭今日黃堂行遂飛
騰而在治其為欣忭罔罄敷陳

賀知紹興府曹徽猷到任啓

伏審光奉帝綸榮分帥節茂宣條教已見吏民風動百
城恩霑一道恭以某官太和陶粹奕世生賢爰際熙辰
亟陞華貫功收漕輓吏瞻猶寒惠浹藩宣民心雅慕就
寵齋壇之拜密承宸極之嚴畢公保釐行起東郊之治
召康夾輔遂臻四海之安矧此越城實惟禹會風烟秀
發擁千巖萬壑之奇牧守循良備三公九卿之選行聞
環詔即造簡班伏念某衰薄餘生迂疎瑣類一官初效

萬幸欣逢方與編氓共興歌於襦袴遽隨屬吏獲托芘
於幘幪榮抃之私敷陳罔既

賀高提舉迎侍回任啓

伏審肅將星節榮奉板輿當一人廣孝之朝獲三釜及
親之養列城交贊夾道駢觀矧惟事母之人尤劇攀鱗
之願竊以斷機著三遷之教截髮營一餉之資類能致
子於賢圖未必使身之親見豈若繡衣攬轡榮持忠信
之華綵服承顏克盡晨昏之道旌麾載路士女溢郭內

瞻壽母之光儀外壯監司之風采永惟盛事孰不歡心
伏念某蓬甕寒生箕裘素履一官聊爾雲霄徒負於曾
襟四壁蕭然菽水莫支於朝夕雖欣捧檄未慰倚門仰
祈陶冶之恩俯遂功名之念是為錫類豈曰薦賢恭惟
某官才大有容德隆無玷蚤蜚英於華要遂抗志於澄
清爰持使節以來斯式迓慶闡而至止當年鯉問以號
鳳毛今日萱闈更欣鶴髮茲乃朝廷君相之意俾貴以
顯其親遂令寰海父母之心咸舉而祝其子可謂榮矣

夫豈偶然手握紫荷召行聞於宣室腰橫金粟戲永見
於老萊顧惟驚蹇之餘幸出帡幪之下儻興衰於一鷄
庶獲託於二天及其成功均致南陔之養何以報德誓
期東閭之歸

賀新餘姚李知縣啓

伏審寵拜芝封榮遷花縣羣情允穆百里增光矧在賓
僚尤懷天幸竊深慶慰恭惟某官高材拔俗厚德絕倫頃
莅政於日畿遂更封於雷社琴堂虛靜雅稱調絃棠砌

寬閒佇聞息訟前即鳴騶之召諒無暖席之淹某行已
及瓜尚思望履屈指旌車之至凝情燕喜之微欣忭之
私數陳罔既

又代趙知丞賀李知縣啓


伏審光膺鳳詔榮綰銅章百里增光同僚有幸竊深歡
慶恭惟某官高材跨古厚德鎮浮譽蚤播於搢紳寵遂
分於民社舜江風月行題品於筆端越國衣冠已歸依
於門下正恐即飛星馭不容來寄雷封某猥處聳丞欣

逢健令承顏有日託茫茲時榮忭之私敷陳罔既

賀李顯謨知明州啓

伏審輟從使指榮鎮侯藩收王畿轉輓之功被外閭蕃
宣之寄搢紳交慶黎庶興歌矧處部封尤深歡意恭惟
某官德隆千古名滿四方當聖朝晏燦之辰歷賢路高
華之選受持星節用行邦財帝曰豐富惟汝之休公有
愷悌字民之術遂飛芝檢旋拜竹符矧句章孝子之居
乃四明洞天之地東連溟渤接三韓箕子之鄉西望鬱

葱嶺萬壑禹門之會惟茲控制允屬循良想朱幡未久
於封疆而青瑣已敷於綸綍聯班玉筍進直金鑾伏念
某一介腐儒半生漫仕何幸他年之卿相來為吾土之
民師念昔執鞭已叨屬吏迨今受地又忝部民進退不
失其依歸榮幸不勝其敷述春風方暢妙履惟和薰益
衛於生經用寵綏於天祿



鄭峯真隱漫錄卷二十四

欽定四庫全書

集部

鄭峯真隱漫錄卷二十五

六

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官中書_臣沈孫璉

謄錄監生_臣徐元康

欽定四庫全書

鄒峯真隱漫錄卷三十五

宋 史浩 撰

啓

賀湯左相啓

萬穹眷佑上宰登庸袞繡重光寵冠百僚之上寰瀛胥
慶歡騰萬口之中矧荷鴻私尤深雀躍竊以上聖裁成
於天地真賢感會於風雲謂才不試曷足以展盡經綸

而位未極豈所以尊崇禮貌乃由亞輔用陟元台王曰
周公父師世始臻於奠枕吾與孔丘德友敵遂復於侵
疆伊我鉅公踵茲前輩恭惟某官德高無玷道大不羣
紙貴西都萬國爭傳其辭藻籌雄蜜席四夷咸識其威
名自登右揆之隆已際中興之盛烟火萬國歲數豐穰
坏冶一陶士銷朋黨上既樂於閒暇公宜極於寵榮垂
堯舜之衣裳伊尹已躋於湯后復文武之境土仲山行
贊於宣王享成於二十四考之間濟美於五三六經之

上某行能無取學術不精徒銜卵翼之恩未效絲毫之
報聽播庭之告幸在末班脩賀厦之誠愧無佳語其為
鼓舞曷罄數宣

賀陳右相啓

敷號大廷策勲右揆仰知人望報四海九州之心俯聽
輿言合萬口一音之訟凡居陶冶倍劇歡呼竊以在昔
有君莫先論相以獨賢為未足乃並任以無遺玄齡善
謀必資如晦之善斷君奭為保式亞周公之為師安海

內既本於同心運天下斯易於反掌季世以往茲風遂凋宣威或佐以丹青佩劔徒聞於彼此豈伊堯舜之聖乃集禹皋之賢恭惟某官學韞經綸氣全剛大由神宇之泰定知德量之淵沖萬變紛紜心如止水一身宰制目無金牛爰捨從班入參政地謀皆體國功實在人故今日之登庸乃異時之蓄積閱鳳歷之二十四考建鴻業於萬八千年某學不逮人文非適用偶逢衡鑑得廁名流吐珠銜環未展雀蛇之薄效攀鱗附翼又須龍鳳之

高翔既側耳於白麻斯贊言於黃閣其為慶抃罔罄敷
宣

賀皇子建王除授啓

伏審王庭敷號帝子褒封始播朝紳聽萬口一音之頌
載頒郵傳騰九州四海之歡矧屬曳裾尤知抃手恭惟
皇子大王蟠英金闕毓秀銀潢朝拱赤墀風采威儀之
峻整夕休朱邸文章論說之淵源夙蘊天材久膺宸眷
愛之欲其富貴天下不以為私得之守以謙冲曾中自

有餘地一聞聖斷之出大叶人心之同某晚獲登門驟
蒙設醴賜之眄睐駑馬增一顧之榮借以齒牙敝帚有
千金之重親逢慶事倍愜鄙悰有其實而有其名既覩
真王之茂建依於忠而依於孝更欣盛德之兼隆喜躍
之情敷宣罔既

賀永州會知郡啓

伏審龍膺明綍榮領近藩條教既敷士民獲所恭惟某
官先生斯文先覺當世真儒學傳西洛之正宗文擅東

坡之逸氣榮膺紫檢屢擁朱藩雖長材無所不宜而俗吏莫與同道投閒未久騰譽益隆受深簡於上知遂亟承於睿獎蕃宣寵寄下車已肅於吏姦愷悌字民擊壤更喧於輿訟佇聽潁川之召即膺宣室之咨某猥以顓蒙獲供灑掃價增騏驥本由伯樂之整齊器備璠璵莫匪玉人之雕琢擢角莫先於藻鑑點頭靡俟於朱衣遂令鼯鼠之五窮獲試鉉刀之一割亞班御棘歸德師門方期剡牘以叙情乃沐飛緘而見寵高風所暨不敏為

慙時適屆於清和氣益增於沖粹更祈保養式副倚毗
感佩之私敷宣罔既

賀沈丞相判明州啓

伏審寵命上公進藩近輔九州生齒昔游鑪冶之甄陶
千里衣冠新起袴襦之歌詠涓辰之吉開府云初諒惟
歡慶恭以某官道德宗師文章哲匠蚤蘊經綸之志屢
揚華要之途屬聖化之更張慶英材之並會首膺爰立
備極有為遽令復古之朝特起中興之治功成名遂而

身退固合天道之常川泳雲飛而志同益厚君心之眷
乃從綠野來擁朱幡句章孝子之故鄉四明洞天之仙
窟江山深秀風俗淳和久煩神物之護持有俟鉅公之
鎮撫睇棠陰於屬邑遐想先猷歎槐市於頤宮猶存舊
蹟祗恐未溫於孔席已馳入覲之韓圭位長三槐眷頌
一命伏念某疎庸無取款啓寡聞壁水橫經既荷權輿
之造化麟閣校籍又繫委曲之提撕惟是歸依實無間
斷雖門牆之甚邇曾竿牘之莫脩勢分既遠么麼敢進

茲幸一廬而受地不嫌三沐以投書冀此寬宏恕其僭
越方金甌之屈序惟鼎食之加餐益介繁禧以扶丕祚
賀張丞相判建康啓

伏審敷綸顯冊留鑰行都六代江山風烟改觀九重宮
闕金碧生輝草木知名衣冠相賀恭惟某官勲隆萬古
誠格兩儀位貴而身愈恭則周公其人也年高而德彌
劭是孔子之徒歟頃專恢復之成謀不主卑陬之和議
脫展黃扉之貴冥心綠野之游尊主庇民先生之志大

矣聞命引道天下之父歸之遂令願治之時復有丕平
之望除書一出率土交歡畢公保釐已服東郊之衆宣
王復古將興北伐之師著績鼎彝增華袞繡某一官投
老萬事無能居懷慕藺之私久有識韓之願扈聖君之
駕已及鄰邦掃舍人之門行隨下客其為欣躍罔既敷
宣

賀湯丞相知紹興府啓

伏審一德格天致吾主於二帝三王之上八命作牧鎮

列郡於千巖萬壑之間涓辰既剛開府云始諒深慶慰
恭惟某官先生命世真儒斯民先覺學撮孔孟之要
文起魏晉之衰自正位於首台亟躋時於太古屬意綵
衣之樂宜心綠野之游起自殊庭膺茲畱鑰蕭何鎮撫
已開西漢之基畢公保釐將起東郊之治佇聞一札歸
面三槐某猥以疲駑久蒙陶冶歸依既切贊訟尤深

賀狀元黃學士啓

伏審文經一覽名冠甲科萬選青錢素已期於必中一

枝丹桂今果見其居前凡其聽聞孰不贊頌恭惟新恩
某官箕裘家學領袖賢關出偶聖時肆敢言之直氣上
當睿意據堅忍之忠謀既首唱於臚傳實豫基於相業
顧惟衰老稔服英聲結駟過門荷華牋之見寵駢肩觀
堵喜陋巷之增光感幸之私數宣罔罄

賀第二人王學士啓

伏審楓陛揚名桂林得雋惟昔偕於計吏雖千萬人及
今究其成功殆一二數士林增氣朝著有光恭惟新恩

其官江漢淵源岷峨峻拔春蠶下筆陳鯁論之萬言振
鷺充庭聽臚音之再唱豈獨萃一時之晁董蓋將為異
日之臯夔退顧衰殘方茲慕用辱臨敝宇遽寵長牋有
嘉錦繡之貽殊乏瓊瑤之報其為感愧莫既敷宣

賀第三人張學士啓

伏審唱第朝端收名鼎甲捫參歷井靡辭仰脇之勞就
日望雲遂啓沃心之論果膺殊選大慰僉期恭惟新恩
其官粹美真才淵源博學擢犀角而拔象齒謀猷已契

於一人附鳳翼而攀龍鱗事業行參於三傑顧惟晚景
夙仰下風曾未造於行軒荷先迂於大旆一緘貽寵十
襲謹藏榮感之私數宣莫既

賀皇孫國公朝參啓

伏審絲綸炳煥許趨昕旦之朝袞繡顯昂獲奉清光之
對百僚悅服四海欣愉恭惟皇孫某官道德家傳聰明
天賦年方踰於志學德遂底於成人逮事曾親洽閨門
之慈孝始隨儲馭覲玉座之凝嚴鶴禁增光龍墀改觀

三宮燕樂率供萊氏之綵衣百世本支肇自丈王之孫
子某漳濱卧疾魏闕馳神聞慶事之鼎來雖曳裾而莫
及喜皇家之葉茂徒擎壤以騰歌抃舞之私敷宣罔既

賀周樞密啓

伏審敷綸北闕命使西樞位雖亞於鈞衡權實專於帷
幄明良相得夷夏均休竊深慶慰恭惟某官王佐碩才
天民達德蚤被非常之眷崛起諸公之先忠直信亮其
誠足以任腹心深醇灝噩其丈足以配盤誥陸贄言辭

曲盡多所建明李絳諫諍自持數聞聽納朝列之姦諛
或進吾身之去就殊輕上簡帝衷歸膺國器既處具瞻
之地茲為爰立之基顧此衰殘久蒙知獎逖聞新命雅
慰初期襲和氣於襟靈睇崇墉於霄漢心懷采切面慶
無從

賀周右相啓

伏審渙敷策命晉陟鼎司覩泰階兩兩之符層霄有爛
仰南山巖巖之石綿宇具瞻廊廟愈尊紳綏交慶恭惟

某官量宏而識遠道盛而德全聲名已暨於海隅每自抑畏文章獨妙於天下曾幾矜誇比輟直於北門久宣勞於西府楓宸注倚槐揆登庸蓋將遲姬旦冢宰之勲奚止閔郭令中書之考某承顏最蚤荷眷特隆定交於百官直舍之中引類於一人踐祚之始雖迫衰殘之暮景靡忘期待之初心遂令篤病而更生親見真儒之爰立屹擎天之一柱已知吾道之益張比廣厦之萬間更喜此身之有託其為欣躍罔罄敷宣

賀王大觀文啓

躋時大治閱九考之中書許國精忠作兩朝之元老惟
金壁於晚景乃衣繡以晝游在昔為榮於今復見傳聞
四遠歡頌一詞恭惟某官道大難名德尊無玷雅誠事
主秉直節以公明強恕接人絕匿情而猜忌一歸於正
何用不臧茲身退以功成諒體胖而心廣行播十行之
綸綍即施再入之甄陶某託契賢科聯姻子舍交情淡
而不厭眷意久而彌隆側聞除目之頒敢後賀緘之布

其為慶贊罔罄敷宣

賀皇子嘉王入第啓

肇新朱邸密拱皇居涓辰日以開藩罄綿區而仰德諒
深歡慶恭惟皇子少保大王乾坤厚瑞海嶽蟠英少也
過庭既聞詩而學禮長焉出閣復重道以尊師逮膺甲
第之遷倍溢重闈之喜行頒紫詔即正青宮某退處田
廬阻趨階屺唯同鶩雀賀大厦之崇成更祝松椿助脩
齡之行裕

賀何中丞啓

擢自諫坡進陞憲府不離納言之職益殫尊主之忠一時儉人率知退聽四海善類莫不歸心諒深慶慰恭惟侍講中丞學紹孔顏材肩夔高力傳家法清源之風烈隱然獨冠儒林南省之聲華藉甚斯丈不墜吾道有依教興多士之賢關譽藹七人之上列迄全冰操遂正霜臺謀寢遠夷信不採於藜藿姦除滿道又安問於狐狸密勿有加登庸非晚顧惟衰朽宜黜陟不聞之時尚喜

賢明居慷慨敢言之地輒忘強聒之誚敬伸善頌之詞

賀周丞相除觀文判潭州啓

伏審元主命袞方紆畫錦以榮歸綈寬篆車旋拜明綸
而特起宅帥垣之重寄冠書殿之隆名疊此寵光允為
盛舉諒深慶慰恭惟判府安撫少保觀文丞相國公道
尊德貴行顯名彰浩浩蒼蒼以李杜韓柳之文傑渾渾
噩噩作虞夏商周之訓詞不出數年爰登三事代天工
而居鼎食扶日轂以麗璇霄宜盤礴於中書遽徜徉於

綠野忠信獲罪彼徒肆於風波禮義不愆吾何傷於日
月剛方之操不易聖神之眷益堅果凝宣室之思復兆
傅巖之夢遂頒一札暫總十連紅旆碧幢聳列城之風
來朱幡皂蓋暢萬谷之陽和佇膺再入之榮永輔重明
之治某受知有素荷德尤深昔薦士以報恩已蒙天獎
今飛緘而叙舊益認歲寒贊善之私名言莫既

代姚主簿與臨海唐知縣啓

官為短主簿未辭簪楚之繁囂邑有賢大夫豫喜帡幪

之芘賴將及瓜而往代欣附鳳之有期顧此懦庸彌深
幸會恭惟某官性資淳厚學術淵微簪組蟬聯箕裘似
續化行百里琴調單父之堂仁並三春花滿河陽之縣
未久割雞之職已成馴雉之功行慶敷綸即膺捉駕某
寒鄉末裔窮海鎖人雖懷慕蘭之私未遂識韓之願夙
同鴈序名聯千佛之經後獲鳬趨猥贊一堂之治幸為
踰分喜實非常時屆清和氣隆長養冀精保耆以副頌
祈

上知明州侍郎啓

荊州識面雖輕萬戶之封曾子有親猶覲三鍾之養未免折腰而為米敢辭懷刺以登門伏念某陋巷迂儒寒鄉冷族襲箕裘於先世抱鉛槧以窮年一問鯉庭悲已纏於陟岵三遷軻室訓猶憶於斷機雖忝效於一官曾未霑於寸祿家徒壁立室若磬垂顧列國諸侯有見招之心而闔門冗累無可去之計栖栖牖下人憐鄭子之甌無碌碌塵間自喜張儀之舌在幸賢太守宣化承流

之始正士君子聞風慕德之秋初拜黃堂之薦言於毫
髮遽垂青眼激餘論於齒牙既茲遇合以逢時誰謂知
已而無禮恭惟某官高材跨古直道得君攬轡澄清蓋
三持於使節伏蒲啓沃遂一上於從班耀紫橐於西清
擁朱轡於南服譙門畫角千里仁聲白晝甘棠萬家美
蔭有大治兼容之量無匹夫不獲之嗟遂憫憲貪特貽
季諾儻令今日有啜菽飲水之資當在他時效吐珠銜
環之報情之所到言不能殫易此而他罔知所措

代彭支鹽上秦提舉啓

孔仲尼之一言久同華袞季將軍之一諾實重黃金儻
蒙不與之恩如解倒垂之急伏念某迂疎未習潦倒餘
生四十年筦庫之微數千里宦遊之遠勉思寸進寧憚
卑飛奉身苟遑於必誅當路或憐其無過章聯四上考
遂終更賜或及於垂成功何殊於起死自非特達其孰
矜憐恭惟某官材號吏師德稱人傑久踐外臺之寄即
膺內禁之除他時當幸於在鈞今日先期於推轂念茲

斷梗將遂及瓜欲不廢於前功故無嫌於再瀆仰冀力
開獨斷深憫孤寒遠馳一紙之春風俾脫七階之選調
誓以桑榆之晚景上酬卵翼之恩

代韓司法上知明州徐侍郎啓

桂幕肆開方託雲天之芘鶚書借重更祈羽翼之恩竊
久服於下風輒自媒於孤跡儻辱青眸之顧必諧華袞
之榮伏念某款啓瑣人迂疎末學箕裘雖在乏隱然風
烈之稱簪紱僅傳賴友于提拔之助念芝砌皆王官之

列唯萍蹤居選調之卑齷齪一身周旋三尺沐部使拜
候之憐念聲雲章霧牘之吹噓考行歷於三周事止愆
於一簣不有負當時特達之見誰其全諸公成就之功
恭惟某官王佐碩才天民達德班辭玉筍來施王霸之
功名姓在金甌佇起曹參之清淨主盟吾道篤意寒生
雙鴈塵埃鳬化唯依於葉令短筇枯槁龍飛蓋化於壺
公敢持小己之私仰累大鈞之造儻憫三薰而與進當
期一諾以為榮馬勃牛溲或見收於藥籠雞鳴狗盜寧

敢負於龍門

代陳提幹上知宣州秦數學啓

竊以萍梗無依靡知定處雲天在望久阻承顏雖尺書
莫叙於寒暄而寸意敢忘於寤寐恭惟某官斯民先覺
當世真儒志慕朝藿爰作布韋之領袖班聯夕閨鬱為
鵷鷺之羽儀一自腰金三膺符竹茗溪風煖汎為二浙
之恩波鄮嶺烟銷散作十洲之春色茲臨宛水遠輩潁
川佇頌玉闕之絲綸即啓金甌之姓字伏念某比叨京

秩復佐憲臺吹噓實荷於齒牙造化靡離於陶冶末繇
趨謝徒切懷恩方氣候之肅清冀寢饗之調護用符興
頌式茂純禧

代王知縣上明州徐侍郎啓

綰銅支邑已託二天被袞清朝更蘄一字矧在齒牙之
末宜居陶冶之間伏念某甕革微生箕裘末學塵埃壯
志已踰知命之年萍梗窮途曾乏致身之路猶持朴直
自分孤寒同輩相憐謂未有不求而得者中局確守知

不可奈何而安之頃者三章論薦之私實出一時不期之會豈圖今日復偶大賢恭惟某官當世碩儒斯民先覺謀猷獻納蚤擅美於西清愷悌蕃宣茲承流於東國顧喧囂之俗狀獲奉揚於仁風介紹不先吹噓每及獨知章子遠追孟氏之風願出韓門敢在張籍之後儻叨榮於薦鶚益有幸於登龍特達高情難與俗人言也寅緣異日當以國士報之

鄭峯真隱漫錄卷二十五

欽定四庫全書

鄭峯真隱漫錄卷二十六

宋 史浩 撰

啓

謝解啓

主丈

一經取藝敢擅譽於鼇頭三歲程能幸收功於鼎足得
踰望外愧溢顏間竊以在昔致治莫尚於賢能歷世取

士最詳於科目懼爾音之金玉張吾法於網羅尊經術
則先經義之求貴文章則惟詞賦之尚眷二者以迭盛
歷千古以莫兼屬我右文之期重廣得人之路稽漢唐
之故以通其變酌祖宗之制以取其中合為一科期於
兩得顧上之所以責望者厚矣則下之所以圖報者奈
何探義理之淵源勵詞華之典雅鋒生絳帳盡期折角
以解頤光溢青箱咸底凌雲而歌雪身兼數器技匪一
長固無慊乎春秋決獄而禹貢行河亦何傷乎賈誼升

堂而相如入室征茅茹以在列脫囊穎以爭先咨舜牧
於四岳之前豈徒詢事議漢傑於諸將之上疇敢論功
宜有通材可膺妙選如某者識非造理學不逮人甫當
就傳之年遽罹陟岵之禍斃斃在疚斷機猶賴於母慈
業業持身投杼懼乖於子職念箕裘之末緒每冰炭於
中局名萃鶚書慨先猷之未泯香浮桂籍餘仲父之獨
存豈無意於續貂媿不成於畫虎頃偕漕計旋遭退鷁
之風茲應鄉書謬舉焚舟之策固難拾芥徒愧彫蟲初

非黃絹之詞偶得青氈之舊是為幸會厥有夤緣茲蓋
伏遇某官學海津梁儒紳領袖望隆江左行登策府之
道山政播日邊聊式武陵之蓮幕爰操衡鑑來主棘闈
荆璞期珍幾至卞和之刖足爨桐何幸遇逢蔡氏之知
音致此棄遺獨蒙收錄固當趨席力叙謝誠而茲短削
之投猥在衆人之後仰繫陂度尚賜海容某敢不勉策
疲駑期追逸駿少遂致身之願當酬知己之恩

錢通判

某官世載忠嘉時推俊傑驂鸞瀛閣展驥海城文筆生
花縹渺仙人之夢詩囊佩錦雍容公子之游綠野江山
每茲得助紅葉風月奚止平分爰馳萬斛之珠璣上贊
九天之韶濩柳御史淮夷之雅未足差肩韓吏部聖德
之篇諒思退舍佇拜紫泥之詔即膺丹扆之求日轉甘
棠散作萬家之美蔭風翔潁水泛為多士之恩波致此
妄庸亦蒙收採

賈簽判

某官才追梁傳語妙君房蓮幕推賢佩風流之邁衆棠
陰止訟表政術之剴繁爰督戰於棘闥遂騰聲於芹蘋
聽春蠶之食葉悄夜壁之銜枚式令賈勇之人材喜見
太平之場屋

劉教授

某官學海津梁賢關領袖策陳一覽名在甲科爰報政
於錫山遂主盟於蘋水問鍾答響陶士類於淵騫發鐸
宣風化海濱為洙泗

王參政

某官道德宗師文章元老議論為四海之標的進退係
一時之重輕頃膺睿主之知參總台衡之重年高而德
彌邵是孔子之徒歟位貴而身愈恭則周公其人也方
期秉軸遽請桂冠風月香山時講白樂天之會烟霞留
邑果從赤松子之游方中興圖任於老成顧上哲曷宜
於韜晦未許浮沈之晉國思庸矍鑠之伏波凡素服於
下風悉許歸於東閣致茲孱瑣猥遇甄收

晏尚書

某官江左儒宗山東相種隱然有祖風烈盛哉奕世賢
才早陟巍科旋登延閣風聲所暨頑懦必興振領天官
正賴山公之啓事請符琳館喜從萊子之斑衣榮聯鴈
序之芳還奉版輿之樂東山雖好其如天下之蒼生北
闕非遙佇拜日邊之丹詔方申申而在宴猶斷斷以有
容凡願出於龍門悉許攀於鳳翼致茲庸瑣亦預甄收
及第謝秦太師啓

蘭省奏名偶參八士楓宸唱第復玷丙科得過所期榮
不蓋媿竊以先王致治宜莫急於賢能後世取人乃獨
詳於科目自庠序乏商周之教養致師友無游夏之淵
源黨同伐異者皆訓詁之腐儒文麗用寡者類彫刻之
童子好惡已殊於鑿枘取捨每病於參商亦既背馳誰
其兼善屬聖君有為之日正賢輔相逢之秋崇雅黜浮
一變斯民之耳目息邪距詖大恢吾道之紀綱探義理
於聖人之言賢人之言辨典則於詩人之賦詞人之賦

近酌祖宗之遺制遠追唐漢之頽風合為一科期於兩
盡詔音所至士氣頓伸鼓篋鼎來揚鞭霧集懷折角解
頤之辨蘊凌雲歌雪之奇當八面之銳鋒應兩端之善
問較以穿楊之藝莫不爭先要之折桂之榮豈誠易得
如某識非造理才不逮人蚤罹陟岵之悲長賴斷機之
訓顧箕裘之末緒每冰炭於中懷晝供菽水之庭闈夜
對簡編之燈火棲身巖谷絕意雲霄茲逢偃革之時遂
起彈冠之興初偕漕計再預鄉書豈期下里之邑人偶

逵高陽之才子賈誼升堂而相如入室慚非能賦之流
高堂傳禮而徐氏為容浪得明經之譽載惟幸會必有
寅緣茲蓋伏遇某官道格神祇勲隆古昔以一命袞為
萬乘師伊躬暨於成湯天開一德周公傳之孔子時集
大成禮制樂作而措率土於一陶仁漸義摩而起斯丈
於五厄力扶王道大正人心俊良既樂於登崇頑懦
亦思於興起致茲翫斲亦被選掄某敢不增所未高脩
其可願趨風有便慰執鞭欣慕之心在治云初汚造物

甄陶之手誓竭尋常之效仰酬萬一之恩

及第謝秦內翰啓

較藝南宮偶參八士獻言中禁復玷丙科揣分已踰撫躬知愧竊以古今共道惟得賢而立邦基國家有為乃觀文而化天下自堯舜廣招徠之路至漢唐發科目之程識高伊管者實洛下之諸生才似班揚者亦開元之進士翱翔丹陛比比有聞照映青編班班可攷迨聖王之撫運得良弼以中興肆霖雨之命而追高宗歌清風

之詩而繼宣后三載定棘闈之制四門多槐市之游博
採布韋駕諸侯之輶傳申求閎閱與刺史之計偕賦就
凌雲豈惟司馬經明拾芥不數夏侯率歸典雅之流盡
去浮華之習哀然出當是舉翕爾咸高其材至於雄據
上游蓋亦鬱為名士顧茲殊選宜屬可人如某者湖海
窮徒乾坤長物鯉庭一問已纏陟岵之悲軻室三遷尚
賴斷機之訓啜菽每懷於養志荷鋤敢怠於帶經雪積
螢飛飽聽霄中之更漏花開葉脫幾經林下之春秋屬

逢偃革之時遂起彈冠之興秋天薦鶚漕臺常預於後
塵春浪化魚天路俄聞於首唱事既分於霄壤勢聞隔
於仙凡懷卞和泣玉之誠敢辭再別舉明視焚舟之策
當在此行果筮跡於荀龍復分香於郗桂雖度長挈大
未足為優而吹枯噓生豈無所自茲蓋伏遇某官道優
聖域文揆國華絳帳談經鄙向歆之立異彤墀謝策極
晁董之未言遂結主知允諧人望北門視草煥王者之
絲綸東觀提綱藹諸儒之領袖居之甚寵進也未央行

趨青瑣之班即拜白麻之詔門凝瑞氣森然畫戟之多
位處台躔美矣緇衣之並收士尚勤於吐握成人每借
於齒牙致此孱庸亦蒙採錄某敢不益堅操履深懋進
脩附驥攀鱗猶念昔年之場屋礮刀錯玉正祈此日之
陶鎔誓竭駑才仰酬洪造

代陳教授謝張侍郎舉改官啓

郵傳薦墨煥同星斗之臨天假亨塗進有階梯之漸幸
既踰於初望感實倍於常情竊以章有定員吏多稱職

部使者擁列城之寄郡太守持千里之權猶且顧視咨
嗟或有賢才遺滯仰惟宗伯實董類宮念於獨冷之官
誰復孤寒之舉自非人傑肯越世情如某者志或可憐
愚無足論自緣弱歲已列諸生聯袂橫經困齏鹽於庠
序悲吟擁鼻工雕篆於詞章幾畫虎之無成偶成蠅而
見取猥塵仕版獲玷師儒雖殫螻蟻之勞曾乏虬蟬之
援灰心無望燭已甚明豈謂上臣之博招先於衆人之
弗及茲蓋伏遇某官業隆王佐道冒聖時自烏府之踐

揚由巖廊之知遇挺持仁者之勇蔚有諍臣之風韋布
歸心措紳拭目果趨夕闥進貳春官職方處於南宮士
悉歸於東閣故茲庸鄙亦荷甄收某敢不策所未能脩
其可願龍鱗鳳翼既有幸於躋攀狗盜雞鳴豈無心於
報效誓茲末路仰復隆恩過此以還未知所措

代韓催煎謝秦提舉闕陞啓

羣然多士薦者詎周叢爾無能公然先及退省涯分實
深佩驚惟人材不乏之秋幸聖世有為之日破資格以

振幽滯躡夷等而登俊良磨礪鼓舞而既足以作成洗
濯矜奮而各爭其奔赴誰匪翹翹之楚居多赫赫之功
然下之自見者既衆而難工上之所取者愈多而責備
宜得高明之士足當宵旰之求如某者性稟蠢愚志尚
迂闊徒緣閥閱獲廁搢紳班資未究於七階歲月徒書
於八考已脫喧囂之犴獄復縻窘束之鹽車涉漲海之
鯨波棲身一葉望屯雲之鼠盜寄命孤洲顧阮眼之誰
開知襴章之絕望猶思冷族獲庇高門惟季父之登科

處師垣之後列至大資開毗陵之幕府而宣城擁鄮嶺
之旌麾或置踐跡於賓僚式剡譔材於辟闕是其幸會
疊有夤緣方圖叙布以求知遽荷提擢而論薦自非人
傑豈越世情茲蓋伏遇某官桂籍真仙詞林大匠澄清
攬轡賢能悉出於甄陶慷慨理輪貪佞率從於棄置屏
私謁以公取器羣材而曲成遂使孤寒之餘亦蒙特達
之遇退惟涼薄何所克堪敢不勉勵赤心益殫清節龍
鱗鳳翼既有幸於躋攀狗盜雞鳴豈不思於報效尚斲

恩地終賜袞言

代王知縣謝徐明州平海寇啓

鳬居孤絕方仰芘於二天蟻聚跳梁忽來攻於四境顧
扞防之無策乃控露以求哀果飛一札之兵符兼檄諸
戎之浪舶羣兇逃潰百里肅清竊以蕞爾四鄉號為一
邑民實星分於洲渚寇惟鼠伏於滄溟雖甚狂謀未嘗
登陸豈謂當茲歉歲乃能旁若無人方聖朝奠枕無為
之辰正賢牧烹鮮不擾之政肯容小醜敢肆遐方乃雲

集於干矛遽麇奔於篙櫂先聲有赫不戰成功而某河
朔寒生江南浪跡卑官投老困簿領之沈酣大府方遙
乏虬蟬之援助非由洪造孰拯羣生恩既重而報賒感
徒深而涕落茲蓋伏遇某官時推人傑帝賚佐材化洽
鄞江變熙淳之雅俗塵清瀚海吹瀲灩之恩波軫念偏
方見侵微孽讐狼心而遠遁使虎口之僅逃某敢不益
勉疲駑力圖守禦餘妖未殄仗嚴令以必行盛德不踰
庶前功之莫廢誓堅末路仰答至仁

代姚主簿謝鄭運使舉關陞

袞言借重荷薦墨之袞揚蓬室增輝仰恩陶之造化至
令及此何感如之伏念某少也無聞晚而竊命青霄志
在寧辭委乘之卑官白首塗窮未免簿書之俗吏念當
時之朋輩已致位於公卿勉試初階倏書兩考才乏提
薦之譽望無薦鶚之榮豈意權輿首蒙甄拔燕臺價重
寶先駿骨之求鄒律聲和能使枯荄之發慷慨之風一
振功名之念再萌實繫上臣之博招先於衆人之不及

茲蓋伏遇某官智足潛達德能廣揚文章江左之宗器
業山東之種晴日容光而必照春風在處以為仁屢擁
使權鬱為人望雖此孤寒之跡亦蒙特達之知某敢不
勉勵官箴遵脩士檢顧桑榆已暮難忘得路之風雲儻
溝壑未填盡是報恩之日月

權昌國西監謝秦提舉啓

折腰五斗承筦庫之乏人仰首二天喜帡幪之獲庇雖
從權於郡檄實稟命之使臺揣分已踰歸恩有自伏念

某迂疎末路款啓細人屬因弓冶之餘遂廁衣冠之列
一官未效寸祿何賒白髮倚門身敢辭於負米黃糧絕
粒甑幾至於生塵偶因齟局之闕員遽使樛材之備數
汎空溟之鯨浪自笑輕生覩積弊之蝟毛每思革故不
繫知遇孰敢奉行飛章一上於使閤俞語果形於公牒載
惟幸會厥有夤緣茲蓋伏遇某官當世真儒斯民先覺
以仁心而察民隱以直道而結主知嚙枯吹生四海仰
其風采揚清激濁一路出其甄陶某敢不勉勵駑材推


原德意使海隅千戶之無告如星輶一日之下臨庶幾
微勞少答大施

代時支鹽謝曹運使舉改官啓

袞言借重荷薦墨之袞揚蓬室增輝仰恩陶之造化非
有薄天之高義誰憐衰地之微姻事既罕逢幸惟溢望
竊以昔者上臣之事主頻能內舉不避親李世以還茲
風不振凡在葭莩之末率懷瓜李之嫌第思爵位之獨
崇不恤賢愚之同滯屬國家之再造偶台輔之首登任

羣僚以至公率四海為歸厚雖為時崛起若范孟博之
監司亦舉爾所知如崔貽孫之相業宜得卓犖瑰奇之
士足當慷慨特達之知如某者資稟迂疎趣尚庸鄙雲
霄志在敢辭筦庫之卑官萍梗途窮遂作鹽車之俗吏
筮仕將踰於二紀歷官徧及於七階敢意龍門首推鶚
薦春風一紙驟回冰谷之陽和駿骨千金頓長馬羣之
聲價茲蓋伏遇某官先生稟天間氣為世英人爰榮擁
於使輅乃備宣於上意功高畿甸給餉饋真若蕭何名

動冕旒把圭印將同裴度懦夫落膽俊士歸心坐令魯
國之多才悉作韓門之弟子致茲瑣類亦藉甄收某敢
不仰止星光依棲河潤龍飛鳳翥已容鱗翼之躋攀玉
振金聲終賴齒牙之成就



鄭峯真隱漫錄卷二十六